

ALAHADY BATEMIN'NY TOMPO TAONA A20



I JESOA NATAO BATEMY: TANDINDON'NY BATEMINTSIKA

Ry Kristianina havana, androany isika no mankalaza ny batemin'ny Tompo, amin'izao Alahady manaraka ny nisehoan'ny Tompo dia ny Epifania ary Alahady mamarana ny vanim-potoan'ny noely izay nandinihinatsika sy nibanjinantsika an'I Jesoa eto anivontsika. Nivoaka ny Trinite masina izy,

Vakiteny I : lz. 42, 1-4.6-7

Tononkira : Salamo 28

Vakiteny II : Asa 10, 34-38

Evanjely : Mt. 3, 13-17

nirahin'Andriamanitra Ray ilay zanany lahitokana dia I Jesoa, tonga eto anivontsika izy, nitondra ny fiadanana sy fanantenana. Tsy hoe sarisarin'olombelona izy fa tena olombelona natera-behivavy, izay no nibanjinantsika ny teny tonga nofo ary miara-dàlana amintsika izy mamakivaky izao taona vaovao izao sy ny taona manaraka rehetra ary ny taona teo aloha koa aza. Raha

mandray Azy isika dia mivoaka isika amin'ny fiainana tsizarizary izay mitondra antsika amin'ny fakam-panahy izay mahalavo antsika, mivoaka amin'izany isika raha manatanteraka ilay teny nataon'i Maria tao Kana nanavotra ny fianakaviana tamin'ny fakarambady lany divay. Avotra isika raha manaraka ny voalazan'I Masina Maria "ataovy izay lazainy aminareo", miteny amintsika tokoa I Jesoa, fenoy ireo siny ireo, izany no banjinantsika nandritra ny noely ka tohizantsika amin'izao isika mizotra amin'ny fankalazana ny faha 100 ny FET sy ny fankalazana ny kongresy eokaristika. Tsara ampahatsiahivina fa isaky ny mankalaza ny eokaristia isika dia tonga eo anivontsika I Jesoa. Izany no

antony hamaranan'ny pretra ny vavaka eokaristika hoe : amin'ny alalany sy miaraka aminy ary ao aminy izany hoe amin'ny alalan'I Jesoa sy miaraka amin'I Jesoa ary ao amin'I Jesoa no entintsika ny miaina ny maha kristianina antsika. Isika no Batemy dia mitafy an'I Kristy raha ny teny marina Iray Aina amin'I Kristy kai sika izao no Kristy mpiara-belona amin'olona, izany no maha EOY antsika, ny maha misionera antsika. I Kristy no misionera voalohany , nivoaka ny trinite masina izy, nirahin'ny Ray ka isika koa dia mivoaka amin'ny fiainana tsizarizary ka mitondra ny fahazavan'i Kristy dia zary Fahazavana ho an'ireo manodidina antsika.

Izao Alahady izao no mamarana ny noely, fisehoan'ny Tompo ny vanim-potoana ankalazaintsika nanomboka ny noely ka hatramin'izao. Fisehoan'Andriamanitra izay midika fanambaran'Andriamanitra ny famindrampony ny noely, I Jesoa zazakely no miseho amintsika, na izy zazakely aza efa manambara ny sitrak'Andriamanitra amintsika, indrindra ho an'ireo mandray azy, fa ireo tsy mandray azy ka manakatona ny fony tahaka an'ireo tsy nandray ny fianakaviana masina tamin'izy teraka. Rehefa mikantona ny fontsika dia ratsy ny ataontsika tahaka an'I Heroda izay namono ny zaza tsy manantsiny ary mbola mitohy izany amin'ny androntsika izao.

Fisehoan'I Jesoa koa ny Epifania, satria ny majy izay avy amin'ny firenena maro isankarazany tonga nitsaoka an'I Jesoa, fanehoan'Andriamanitra ny famindrampony amin'izao tontolo izao izany fisehoana izany.

Feno 30 taona I Jesoa araky ny famaritan'ny Soratra Masina, izy nanatona antsika teo anivon'ny vahoaka nanantona an'I Joany hanao batemy azy, hanambarana azy koa hanantanteraka ny famindrampon'Andriamanitra, ny rano manambara aina, ny rano ampiasaina amin'ny batemy, io no anehoan'Andriamanitra fa hanome ny ainy, mahafoy ny ainy ho antsika ny zanak'Andriamanitra, ka ny Fanahy masina fahatelo amin'ny Trinite masina no midina eo amin'ny ranon'ny Joridany manambara an'izany, ny lanitra misokatra, indro ny voromailala miseho ary indrindra amin'ny fahanginana no isehoan'ny Ray manambara ny fidinan'ny Fanahy masina, mila famantarana isika, ambaran'ny evanjely " *nisy feo avy amin'ny rahona, inty ny zanako malalako izay ankasitrahiko indrindra*", izany hoe ny batemin'I Jesoa manambara ny trinite masina, ary ny trinite masina mivoaka haneho ny famindrampony, haneho ny fitiavany eto anivontsika. Mampahatsiaro antsika izany araky ny lazaintsika tamin'ny noely fa takalo tsy takatry ny saina ny takalo tamin'ny noely satria Andriamanitra nidina, azo lazaina fa very tombotsoa izy, ho an'ny tia tahaka an'Andriamanitra dia ny fitiavana tsy misy takalo, tsy misy tombony fa fahafoizina mitondra amin'ny fiombonana. Io matetika no tsy misy amin'ny fiainantsika satria ny fitiavan-tena no manjaka. Tonga zanak'Andriamanitra isika izany no vokatry ny batemy. Tahaka an'I trinité masina nivoaka, isika izay vita batemy tsy maintsy mivoaka, misionera isika, izany no ezaka ataontsika amin'izao taona masina ny misiona izao. Isika koa tsy maintsy ho EOY misionera mitondra an'I Jesoa eo anivon'izao tontolo izao ary ambaran'I Joany batista ilay nanao batemy ny toe-panahy tsy maintsy ananantsika dia ny fanentrentena, indrindra ny fahatsorana. Izany no hahafahantsika mameno ireo siny enina izay manambara fa misionera isika, ny loharanon'ny misiona dia fantaro fa ny vavaka, izay no mahatonga ny siny voalohany mivavaka, tsy maintsy manovo izay iraka ataontsika ao amin'Andriamanitra isika. Andriamanitra tokoa loharano ny iraka ka tsy maintsy mameno ny siny voalohany isika. Izany no ambaran'ny batemin'I Jesoa raha nisokatra ny lanitra, nisy feo avy any an-danitra nilaza inty ny zankao malalako ankasitrahiko izy. Izany no tsy maintsy hivavahantsika sy ny antom-pisiansika

satria zanak'Andriamanitra isika, izy no manolotra antsika eo anivon'izao tontolo izao, tahaka ny anoloran'I Jesoa antsika amin'ny batemy, izany no dikan'ny batemy mahatonga antsika manolontena amin'ny eokaristia satria eo no mampiombona antsika amin'Andriamanitra. koa isika irahina eo amin'izao tontolo izao.

Rehefa vita batemy I Jesoa nisokatra ny lanitra, rehefa miombona amin'Andriamanitra isika dia misokatra ny fontsika ary miroso lalindalina hatrany amin'ny maha zanak'Andriamanitra isika.

Izany rehetra izany no antintranterin'ny tenin'Andriamanitra amin'izao Alahady voalohany mandavantaona idirantsika hamakivaky an'ity taona masina ity. Araka ny voalazantsika, ny batemin'I Jesoa mahatonga antsika hahatsiaro ny batemintsika. Fanontaniana tsara apetraka nataontsika inona ny batemintsika?

Raha mahatsiaro ny batemintsika isika ka hiainantsika marina tokoa miroso amin'ny hoe VITA BATEMY AHO KA IRAHINA

Izao batemin'I Jesoa izao no Alahady voalohan'ny mandavantaona satria handeha isika hamakivaky an'io taona io ka EOY vita batemy ka hirahina isika, izany no ambaran'ny vakiteny voalohany ao amin'ny bokin'Izaia mpaminany, izay efa manambara sahady ny fanirahana an'I Jesoa eo anivon'izao tontolo izao hizara ny famindrampom'Andriamanitra “ *Indro ny mpanompoko izay tantanako; ilay voafidiko ka sitraky ny foko; napetrako ao aminy ny fanahiko; hamoaka fahamarinana ho an'ny firenena izy. Tsy hiantso mafy izy na hanandra-peo, na hanao izay handrenesana ny feony eny andalam-be. Ny volotara efa poritra tsy hotapahiny; ny lahin-jiro efa ho faty, tsy hovonoiny. Hanambara ny rariny, araka ny marina izy; tsy ho ketraka izy na ho kivy akory, mandrapanoriny ny rariny amin'ny tany; ary ny nosy hiandry ny lalàny*”

Izany ny misionera, izany no tanterahin'I Jesoa ary tsy maintsy ho tanterahintsika sy hivelomantsika eo anivon'izao tontolo izao fa indrindra raha fenointsika ny siny fahatelo dia ny maha-mpanompo antsika izay manambara fa mitondra ny vaovao mahafaly, mitondra ny fahamarinan'Andriamanitra, mitondra ny rariny sy ny hitsiny eo anivon'izao tontolo izao isika. Vokatry'izany dia mamafy fiadanana sy fanantenana eo anivon'izao tontolo izao izay rotorotrotry ny zavatra maro tsizarizary vokatry ny fahotana na ny tontolo iainantsika izany na ny tontolom-piainantsika, na ny tontolom-pinoantsika, izany no mbola anentanana antsika ry Kristianina havana, araky ny fanapahankevitra ny fanjakana fa ny 19 janoary no fambolenkazo nazionaly iombonanafa isika noho io andro io Alahady io dia ataontsika asabotsy na andro hafa izay efa natombontsika tamin'ny fankalazana an'I Kristy mpanjaka.

Ny fanjakana no manao antso avo, azo lazaina fa fahasoavana ho antsika izany satria ilaina ny fambolenkazo, miharatsy ny tontolo iainantsika, vokatry'zany ny toetrandro manahirana antsika.

Ny maha Kristianina antsika dia isika voahiraka ho eo anivon'izao tontolo izao, tsy an'izao tontolo izao isika na dia eo anivon'izao tontolo izao, antintraterin'ny vakiteny faharoa izany “ *feno Fanahy masina izy rehetra ka hafaka nandray ny hafatr'Andriamanitra, tsy nisy intsony ny fanavakavahana fa zanak'Andriamanitra izy rehetra.*”

Tsy mizaha tavan'olona Andriamanitra, izany no anirahana antsika ho eo amin'izao tontolo izao mba ho EOY ka hanorina ny ETA tranoben'Andriamanitra mampiombona antsika izay tsy maintsy

arovantsika sy kolokolointsika sy hatsaraina, ny tranoben'Andriamanitra dia ilay toerana ho antsika rehetra, manorina an'izany isika ka zary taranaka mpanorina. Izany no voalaza ao amin'ny Asan'ny Apostoly amin'ny vakiteny faharoa androany. *“Hitako marina tokoa fa tsy mizaha tavan'olona Andriamanitra; fa izay matahotra Azy sy manao ny marina, dia ankasitrahiny na aiza na aiza firenena misy azy.”*

Ry Kristianina hiroso lalindalina isika, hiditra amin'ny mandavantaona isika, Ady sady Dia, ady hialana amin'ny ratsy sy Dia hiroso amin'ny tsara izao taona masina ny misiona-izao ka ny Fanahy masina hanentana antsika mandrakariva amin'ny ataontsika rehetra, ka ho ambininy isika amin'ny ataontsika amin'ny fiainana andavanandro, ka enga anie Andriamanitra izay mampibaribary amintsika ny fitiavany ka mahatonga antsika zanak'Andriamanitra izay hanehoany ny famindrampony hahatonga antsika ho tahaka an'I Jesoa izay nandray ny batemy, nirahina hitory ny tenin'Andriamanitra, ka isika koa noho ny batemy noraisintsika, hiroso sy hivelona bebe kokoa ny batemintsika.

Ry Jesoa Tompo, ianao no tonga olombelona, natao batemy tao amin'ny ranon'I Joridany, ianao no mpanala ny fahotan'izao tontolo izao, ianao izay tsy nanota nanaiky ho fahotana mba hanafaka anay amin'ny fahotana, mihanta aminao izahay, ampio izahay hazoto hiaina ny teninao, handray ireo manodidina anay sy hanaja ny zavaboahary ary hivelona ny sitrak'Andriamanitra eo amin'ireo manodidina anay ka ho zary EOY, misionera tokoa izahay hanorina ETA ho taranaka mpanorina. Amen

Mompera Arsevka Benjamin Ramaroson